

四庫全書

史部

欽定四庫全書

史部

山西通志卷一百四十四

五四

詳校官給事中臣王鍾健

檢討臣德生覆勘

總校官進士臣朱鈇

校對官編修臣沈清藻

謄錄監生臣葛魏錫

欽定四庫全書

山西通志卷一百四十四

孝義四

遼州

明

趙傑楊浩景泰間俱以輸賑旌為義民又裴輔亦輸賑  
千石人皆頌德焉

徐煥和順人正統間輸賑千石旌表

張紀字廷緒事母侯惟謹母卒廬墓狐雀馴擾弘治間  
旌門又有蘇希堯希舜父沒兄弟廬墓著孝

陳桂和順舉人蘭陽令先是弘治辛酉邑人夢城隍言  
第六名陳某事繼母至孝榜發果驗

石麟字嘉瑞榆社貢生官翼城教諭事父克孝撫孤姪  
養叔母人亟稱之初無嗣將納周女為妾會妻有妊  
遂令改適連舉子二可珪壺闕教諭可璋進士

王鑑字賜之遼州人事親至孝父歿廬墓慈烏集鳴甘

泉湧出母亡廬墓泣血喪明嘉靖五年旌門又有王  
深父歿廬墓嘉靖間旌表

傅明道江西人籍於遼諸生安貧篤孝祖父客死千里  
負骨歸葬母謝臥病嘗藥祈代比卒哀毀廬墓撫按  
給銀穀布帛示旌萬厯間命為儒官弟明倫割股奉  
母

成大器遼州人家貧克孝方父病篤子喪亟誠家人勿  
哭恐遺父憂及父愈問之大器婉答如平時

侯子向諸生性孝友每食思親不置兄弟析產讓肥取瘠有鬻女償債者亟取券焚之庚辰河南饑多就食於遼賑活甚衆以子維泰贈承德郎

李休徵弟廩生龍徵被賊執去大罵不屈死母楊痛子言賊亦遇害

蔡翔吏員謁選聞母衛喪號慟奔歸廬於墓手植松柏烏巢其上人謂孝感又有趙鯨諸生母卒廬墓稱孝喬舞鳳家貧拾還遺金初無嗣後舉三子又有常紹緒

李應科亦嘗還金焉

王壁諸生母楊疾亟刲股愈之後母卒廬墓隆冬生豆  
一叢人謂孝感

田粒民周之正俱以妻死不再娶稱義

鹿位事繼母至孝母卒廬墓得危症誓不肯歸病尋愈  
哭奠如故又有張道生亦廬繼母墓堅不避寇人稱  
孝子

孟效先諸生孤貧力學母癰疾口吮其血比卒朝夕謁

墓悲號不輟

田舜耕家貧精醫力養嫠母以孝稱縣令表其名於旌

善亭

曹法參幼孤事母甚孝人稱曹孝子兩院歲給粟帛以

示旌

樊大才田一盛俱以封股愈親疾稱孝

鞏延昌父良心客死於閩延昌聞訃不食三日遂自縊  
常懷仁和順人執鞭為業每出必計日費養親或遠購



芳鮮封寄及還見父常泣蓋悲其不能躬養也縣令程有本申請旌表

劉春和鬻飯為生晨起必舉第一碗奉父父年八十餘事之益謹崇禎間縣令程有本為請旌表

國朝

劉有光遼州人周急好施常於漳河造橋六十三道並備歲修資斧以利行人兵燹後難婦累累贈費送歸各籍掩骼給槥多義行順治十二年旌表

王道平字亨衢榆社人家貧力學以明經薦淳篤有至  
行父逝三年哀毀事孀母尤謹撫弟妹四人胥成立  
晚為聞喜訓導學者稱人師以老乞歸卒

沁州

金

閻衍歿於王事以義稱其子忠避兵居高唐州善屬文  
仕元累官翰林學士承旨

楊士元武鄉人讀書力耕事父晨昏不廢定省族有貧

者悉為婚喪鄉人高之孫德修以十歲舉明經

明

宋冕洪武初輸粟千石助軍需天下既定以功授琅琊

知縣

張尚忠監生幼喪母祖母王育之色養不違比卒哀毀廬墓以疾亡

張化沁州諸生年六旬事親猶如孺子比歿絕甘旨音

樂者三年

程碧正統間捐賑三千石旌表

牛讓景泰間出粟千石賑饑旌表

王來麒貢生親死哀毀廬墓不束髮者三年有兔蛇繞墓一禾雙穗之異舊志載與王來鳳俱旌孝子

溫繼宗諸生苦貧盡孝套兵入寇堅守父柩與叔淵等力戰擊傷二賊賊大至中矢死嘉靖間旌表

郭紀偕弟縉以力農富好施建義塾置義塚助婚助葬嘉靖間紅巾賊起過閭不入曰義士家也二十年邑

早捐賑一千五百石奏得旌表子昂刊日記故事行世

牛貴嘉靖間寇犯城下輸米百石以濟兩拾遺金一還其人一不得其主建橋五座以義稱

王繼沁源諸生樂善好施萬厯間大疫施藥活人又嘗輸粟助修磚城壽至八十

武彪父病嘗糞糞苦喜曰甘則可虞苦即無憂矣父薨愈後彪卒李崆峒為撰墓碑

霍樟沁州諸生家貧力養得親歡心萬厯間撫按旌表  
崔冠字尚忠太學生母病籲天求代父病刲股和藥病  
俱愈赴京謁選父歿奔喪徒跣數千里踵裂血流官  
陝西河州判官督糧西寧有政聲

武威母病籲天求代病果瘥官扶溝丞心動即歸而母  
果病以孝行旌表

史正春性至孝母病劇嘆曰古有王祥卧冰鯉躍若母  
病可愈堅冰可卧而釋也即赴沁河解衣卧觀者如

堵逾時氣蒸冰釋身幾溺兄力掖之乃出母果愈

趙一鶴父病篤夢人謂曰得鶴肉可愈鶴以其名符潛割股昏沈間聞語曰與汝紅棍二條烹以進病即愈

### 奉文旌表

趙廷舉性孝友負米邯鄲力養二親母病祈藥武當往返四千餘里母尋愈久之母卒哀毀廬墓專侍父側崇禎間流寇至父克寬年八十巷戰被執義不屈廷舉號泣求代不得父斃糾衆復讐手刃賊首自言我

趙某來報汝賊圍之隨投井死海陵許光震為作孝  
子傳遠近多賦詩子夢鯉謁選都門夢父血流盈面  
心動即歸中途聞難哀毀幾絕終身不仕

胡養心節婦李氏子以孝著天啟甲子負母避水比明  
視水痕高與屋齊衆多漂沒養心家獨無恙時謂孝  
感

吳檜字成甫孝友謙恭歲饑出粟賑全活甚多

李智武鄉人父病篤沐浴默禱南山神祠引刀左脇摘



肝少許烹以進之立愈

魏瑛武鄉人性孝父病侍藥不離比卒哀毀廬墓哭奠

三年

李之沆武鄉人事親孝崇禎壬申流寇至境奔歸扶父入城避路被執父善醫獨不肯為賊診視賊怒欲殺之沆請身代不許伏屍號泣賊併殺之

魏以繼武鄉諸生應省試母喪慟哭奔歸時寇亂所親力阻其行不得曰母死不歸禽獸也即不幸死賊手

猶得免於禽獸至陰仙果被執大罵不屈死

國朝

李秦沁州廩生親歿廬墓三年祀鄉賢

程乘龍武鄉人父死寇突至從容殯殮號哭盡禮賊異而問焉指櫬嗚咽曰父死不殮非人棄父得生猶死賊以為義呼衆共舉瘞之酌酒致奠以去

程偉績少司空啟南次子由增生入太學闖賊勒餉代父受繫驅入關中會賊相牛金星為舊識縱之於虎

豹兵戈屍骸中獨得生還備嘗艱苦

李若桂字月台武鄉人父浩然

國初官軍過洪水村倉猝中誤認率村人韓所志等禦  
之既而提刑司按捕若桂不忍父之罹於法也號泣  
廳事下祈以身代縣達其事若桂遂與所志等胥解  
京九人罪棄市獨若桂以純孝蒙

恩獲免歸奉父終其身

趙御封順治六年姜瓖之變奉親避兵猝為所執不屈

遇害後有兵至憐之將其父母妻子俱放還

劉青藜字奉若沁州人歲貢生姜逆之亂負母避堯山  
砦累日不火食而母甘旨不缺攜弟青選青璧履險  
岨兩足悉潰爛賊平督兩弟讀書不懈後胥有名諸  
生中少友吳文端以弟畜之文端貴視如少賤時無  
少加禮文端嘗嘆息言人之知我不如劉之知我也  
壽七十四歲

秦珍早歲失怙乘隙即至墓傍長跣號泣至暮歸家衣

衫淚透不使父知人皆憐之流賊敗逃至境執其父  
以去叩頭乞命賊為感動父病籲天求代比歿哀毀  
骨立獨宿三年妻死不再娶鄉里咸高其義

吳時諫字信臣沁州人文端季子少饑諸生中有文名  
尋選貢國學性孝友母宋病夜必五六起宋暨文端  
卒胥哀毀事兄進士時謙恪終身無私蓄與人交有  
終始子丑薦饑捐粟三百石散賑又設徐村義學里  
人德之舉孝廉方正力辭不獲而遽卒著詩古文辭

藏於家

武籙長武鄉人性淳篤父兆麟官沂州同知沂多捕賦  
籙長賣地二頃得三百金代輸父大喜父歿家日貧  
受廩餼又舌耕以飲佐之進母饌必豐必潔母嘗病  
不解帶五十日比歿三年不入室籙長恥干謁終歲  
不履公府然嘗力請復屯米洪洞范彪西雅重之又  
嘗建石橋文昌閣歿後五十餘年武鄉人稱孝義者  
曰武齋長

魏名雯父崇奎官興縣訓導卒於任扶柩歸鄉慟幾絕  
身守柩妻孥罕面免喪又淹二年殯後始歸家

趙簡武鄉廩生七歲失恃號泣欲從地下父夢鯉繼娶  
陳氏簡事之如所生過病侍奉湯藥衣不解帶後父  
卒哀毀骨立三年未嘗入私室又每歲捐金修南門  
外浮橋克承父志邑人德之名曰世濟橋梁雍正十  
年奏旌

平定州

宋

李志學天性好學成大儒登淳熙進士授校書郎母艱  
廬墓三年日夜號泣不已子長福次壽同登進士人  
皆以為孝感

金

耿升天性好義與妻避兵被執不忍禍及鄉衆遂皆死  
之州帥聶珪旌其節具禮葬焉子守直登進士金亡  
隱居三教里終身不出



趙瑛父卒哀毀過禮人稱其孝子世林為報政者知舉授百夫長孫大為為祁邑鄉百戶亦以孝稱人咸美之

劉義五世同居二百餘口庭無間言家無私蓄大定中封進義校尉子貞孫曰輔曰允皆登進士

元

王構無咎子少遊李治楊恕之門時稱君子後舉孝廉授寧夏路教授歷翰林編修吏部主事改寧晉縣令

時有胠篋之盜聞構至即以贓還主而去恐辱賢宰也遷監察御史改國子監丞進司業與祭酒許衡同定監規頃之同知衢州路總管構性至孝居喪廬墓六年兩致白兔繞墳之異有詔表為孝子門

楊國祥號杏園壽陽人佃漁為業嘗得遺金失羊必反其主取與不苟以義稱

王文翰孟縣人性孝家貧傭書養親年五十母雙瞽翰每夜默禱於天母目復明人以為孝感二子曰仁曰

義俱登進士皆以文學孝弟聞稱世德云

高溱孟縣人舉孝廉知太原府事弟清同知保德州事  
津樂平縣令浩獲鹿縣令悉有惠政子貴孫廣以恩  
補粟陽令居家和睦同爨二百餘口

李朝英至元間進士授汾州判五世同居百口無間言  
太平中旌表

胡永生金末勤學務本鄉人鰥寡貧疾者贍之喪不能  
葬者助之以子輔封忻州知州

韓嗣家饒裕至元間值饑兩出粟賑活萬餘人

張起元孟縣人由進士令平原以孝友稱賊過相戒不入曰無犯義門

胡彪樂平人有孝行父母相繼卒廬墓側三年哀毀骨立有司奏聞表其門終身不復仕曰吾親逝矣仕將何為教授鄉里人稱為松風先生

明

蔡苓事父至孝父卒合葬母塋開壙見棺號慟欲絕遂

廬墓側地舊多豺狼至是皆斂跡避去

王克已壽陽人母喪廬墓兵亂獨號泣不去賊感其孝不忍害太祖以文學孝行辟除戶部主事特陞吏部尚書甄拔咸得人尤以清介著乞歸無餘蓄

李倫永樂間舉人授府軍前衛經歷歲餘聞父思已即棄官終養

和承芳舉人令唐山遷趙府審理父卒斬衰竹杖行千里居喪哀毀制終不起世稱真孝廉

朱鳳幼孤嗣叔父聰後聰無間言及卒叔母董氏重其  
貲產逐之鳳旦夕定省不廢以子方封都御史張景  
華銘墓

郭布岳曇霍九德鄭士廉胥壽陽人正統間以捐賑旌  
為義民

張有餘樂平人正統間年饑捐粟萬石又張恪張崇義  
劉執中李惟秋歲荒蠲賑有差

楊璟正統間輸粟賑荒蠲書褒美以子清貴封文林郎

高鼎孟縣人成化間歲荒鄉人多逋鼎日計存者給糧  
全活甚衆又張宗政弟宗顏朱玉歲饑發賑鄉人賴  
之

吳宗壽陽人性孝親喪盡禮哀毀廬墓歲旱宗居週十  
餘里雨獨霑足成化間旌表其廬賜冠帶年八十餘  
無疾終

白傑性淳樸弟侃為陝西副使卒遺一子病廢育之過  
已子以子思明膺封典弟儀子思聰弘治間俱以好

義賑荒授承德郎七品散官又王斌設粥施藥亦以  
義稱

閔邦偉壽陽諸生繼母喬氏性最嚴事之惟謹嘉靖間  
負母避寇入懸密寇退母出密遂傾人謂孝感

朱綸隆慶萬厯時修城捐銀歲荒捐米又生員和蘊敬  
歲荒輸粟與同庠李采立義塚俱蒙恩詔授儒官又  
張嵩齊海楊朝臣徐煥俱以救荒旌門

岳崇壽陽舉人任河間同知事孀母謹母嬰疾湯藥飲



食起居必躬親之不做婢僕

趙蒞郭萬諸生馬孔熙俱廬墓

趙文耀壽陽人性孝父喪廬墓負土築壘三世祖壠制  
終方歸

高超家貧力學尤精篆書教授生徒多賢士事母以孝  
聞助婚葬剖曲直閭里感化壽八十而終

張鱒孝行純篤痛母早寡中歲失偶不再娶母病目盲  
鱒憂之髭為盡白

閻芝壽陽人性孝父感熱疾思食冰時盛暑無所得乃  
顛天泣求至蔡莊河石麓下有冰湧出持歸進疾遂  
愈子季才事母克孝飲食湯藥必親之母卒如素三  
年足跡不及戶外

郭瑜郭珍呂志貴施鼎張鸛楊威歲荒捐粟高玠歲荒  
捐銀米並得旌表

閻明性孝友嘗出粟賑民鄉人尊之又張拳子玉孫顯  
三世皆樂施濟衆奉救旌表白大叅為作傳

楊一魁孟縣人少商遼東有女避兵攜金三百兩以自  
媿弗許訪其舅還之納妾崔氏入門流涕立呼其父  
迎歸不索直後竟舉子孫亦多貴

張鶴字鳴臯孟縣人課子嚴常曰學問之道無他真知  
實踐存乎其人幼喪父事母盡孝恩賜冠帶子淑名  
雋

李源朝英曾孫鄰有失馬者誤認源馬與之不少怒後  
鄰得馬復還源馬子公勤獲盜麥者詰之乃戚也囑

父與麥人稱世德

魏志孟縣廬生父喪哀毀幾死廬墓所負土築墳夙夜號泣遘疾卒

鄭時濟年十八母病思肉食家貧不能得割股以進母尋愈

張啟明樂平人父疾不離左右及卒廬墓三年又有諸生趙士廉廬父母墓六年

梁民望樂平貢生性孝友親疾嘗湯藥衣不解帶及卒

哀毀杜門不出

常守家甚貧繼母老病竭力以養始終不怠

梁民樂平諸生性孝父喪哀毀母疾親侍左右及卒躃踊三年不入妻室

趙恒樂平舉人性孝父卒哀毀母卒痛絕復甦鑿穴墓側朝夕哭奠搢紳為作二十四感詩

侯定國樂平人家貧事母孝納妾李氏見其子憫而還之撫姪宸成名

柳鎔壽陽監生天性孝友崇禎間闖賊追餉兄錦姪某  
俱繫獄中賊以錦舊令平山捐助不足必欲得而甘  
心焉鎔不忍其均斃遽令已子淑孔代之賊知其情  
亦為感泣竟得俱釋

安輔邦諸生闖賊敗歸與陳一中罵賊不屈投井死

國朝

張石麟諸生父三謨官御史親喪廬墓三年麟亦博學  
喜士善古文詞父卒哀毀廬墓人稱世孝

耿丹字子真平定人少嗜讀書垂譽藝苑父母愛之應童子試州守魏亟嘆賞成諸生偕其弟骨以孝聞而家甚貧廩餼不能贍則舌耕以為養摳衣升堂頌禮甚嚴執經進者踵相續也年踰六十母喪猶孺子啼不止廬墓朝夕奠三年不忍去有辭墓詩曰為報三年愛暑寒僅再更又曰一朝辭墓側恍似絕裾行一時士大夫多屬和後以歲貢官滎河縣訓導

張景星字伯顯平定人明季以拔貢生通判保定府未

任時有子青雲年十五於州南道中得遺金四百兩以告景星曰金至四百非大賈則公帑也不然亦必有急其必還之跡者行且至矣已而樂平盛驛丞踉蹌至曰吾領帑太原俾卒先載歸卒以醉失去奈何控諸州州為繫所過主人及旁舍兒拷之景星知非詐乃入州衙使人報拾金者在是無窮治為也遽出付之趙忠毅南星為文紀其事

武更新壽陽人家貧事癡母曲盡色養母年至九十有



六終始不渝人稱孝子

祁繼昌壽陽人拔貢生父性耽弈至忘飲食昌每懷食隨之父以年老受戒為假神籤勸解飲食如初至父所啖吐之物拾取自嚙不以為污居喪三年竭力盡禮年過七旬孺慕不衰

閔順字孝純孟縣人歲貢生善事父母父病嘗糞以驗疾痊否父母歿廬墓凡六年治家循家禮建祠堂出入必告又建五倫閣繪圖於壁知縣事蔡璜記之著

小學衍義務實編藏於家

王璐孟縣舉人輕財尚義鄉有貧至鬻女者歸自館中  
罄修金贖之不少吝壽陽典史某子約婚守備某女  
典史罷守備遂欲寒盟璐百計勸成賣馬輸銀以完  
其婚是時某女年已三十有五云

趙法忭字閱道孟縣人邑弟子員幼喪母事父孝事繼  
母亦如之祥琴後遇忌日必詣墓攀栢哀號析箸田  
廬什器胥取其瘠敗者生平無隻字入公門鄉邦重

之

王纘先字接武孟縣人性孝謹鄉人稱長者十歲從父避賊遇賊於塗父為賊執纘先捫懷曰金在是能釋吾父金可盡得也父去探懷中裁二銅鎖賊怒甚既而義之獲免嘗步園畔見有盜果者亟引身避之曰吾不欲以細故敗人名也邑故家鬻女為人婢典衣數襲獲八金贖而還之誨子暨孫肄業雋鄉會試者六人封文林郎翰林院檢討年九十三卒

忻州

金

楊正德與弟庸德俱郎中滋善之子父歿兄弟哀毀及  
葬同廬墓側朝夕哭踊者三年金末兵亂一家免害  
人以為孝感

樊寶天會間捐粟賑饑存活甚衆

元

樊大臨定襄人任宣德路稅課副使父天用語曰吾家

不甚貧毋苟取以累我大臨廉謹自持每歸省陳行  
李於前後聞父疾馳歸相見乃卒服闋不復起

明

孟彥和洪武間宋士廉等謀叛以計擒之賜銀旌功  
鄴君積定襄人洪武時亂後屍積與妻寇氏親歷郊野  
設法瘞之歲時致祭不替

張軾宣德間舉賢良方正歷綏德知州居喪廬墓又邢  
政亦廬墓朱聰潛郝連俱有孝行

張昇王經宿昶武謙周仲德俱以年荒捐銀粟旌表又  
范永澄凶年助賑全活甚衆

張紹光定襄人母趙氏嘉靖時為寇執去光年十五弟  
紹冕方二歲光晝夜哀思潛探音息萬厯間互市罄  
產贖回時母年七十一矣父守清年六十八兄弟孝  
養父母俱逾八十終

邢銓好施與每冬構橋南河濟涉嘉靖末虜俘人口逃  
回過州餒不能行銓以餼糧給之全活甚衆子瓚亦

有父風

張秉誠流賊入晉衆議避去誠言賊無定處逃將焉往  
糾衆守堡累敗賊兵守壯之薦於代州賁總兵以功  
授守備卒又范震率衆禦賊賊刺其腹誓不絕口而  
死又趙徵庸武生偵知土賊聚草梁山請得鄉兵五  
十人搗其穴賊遂散下山馬蹶而死

曹貞麟廩生父為流賊所戕負屍還走賊疑其有財迎  
刃哭曰寧殺我勿驚父魂羣以為孝子護送之其孫

宗姬父早喪事祖母傅氏曲盡孝敬數十年如一日  
人又稱順孫焉

吳一變定襄人少喪母事父至孝守父喪水漿不入口  
三日哭絕者再三既殯穴居墓側二日一食負土築  
臺哀苦骨立遠近賢之

韓思齊定襄人孝友樂施父喪廬墓母病禱天求代營  
先壠養伯父撫幼弟拾還遺金人咸重之

邢元貞元亨賣酒為業誓言不分居竭力養親以孝聞又



生員梁田居喪邢昂刲股俱以孝稱

桑成名介休人流寓定襄父疾嘗糞憂心及歿寢苦灑  
血恪遵母訓中丞曹飭買上地五十餘畝給為桑氏  
業以旌之並立石縣門外

楊珍靜樂人母疾躬侍湯藥十餘年無怠母卒哀毀骨  
立

鞏江靜樂人任耀州判與弟淮居不析爨又呂天召性  
孝友父病篤欲以所蓄八百金遺幼子先示召召曰

大人愛子某獨不愛弟乎分毫不取父卒廬墓三年  
事繼母如所生

宋可孝字爾先靜樂人兄嫂死女甫三歲子德政未週  
歲夫婦育如已出及德政成立以產讓時論高之

呂新鎬父好施與常曲成之父老疾日夜不離側五年  
又馬雲以割股稱孝

李鳳靜樂人年二十五失偶不再娶持躬方正壽至七  
十有五

郝登科髻年拾金還人又王敬王承碧俱還遺金

郝萬幾字慎夫靜樂人母早逝事父曲承意指病侍湯藥及卒殯奠俱合禮里中稱孝

吳忠靜樂人事繼母至孝母老病不能行時值寇變負之去衆多被害母子獨免

石應樓定襄諸生崇禎間同張鳳來捐米為守城計俱以義稱

趙裕心忻州人崇禎中以孝被旌

國朝

李友直事繼母克盡孝道每有所往負之而趨值母病篤嘗糞甜苦致神人賜瓜之異

石含鑛定襄人天性篤孝母卒悲慟嘔血幾至滅性父文煥勸諭再三稍為節哀殯葬如禮日侍父側曲取歡心父壽至八旬人謂孝感云

韓士章定襄人家貧而養父母膳甚腆不使知瓶無儲粟也母歿典身營葬事自殮暨虞無缺禮父歿日伏

草土中形容枯槁見者皆稱其孝

薄良珥定襄人邑弟子員少慷慨有大志善治生術濟  
族黨緩急不少吝而事父母尤孝妻王氏亦克相之  
母韓氏嬰病且殆醫罔效良珥日夜禱願以身代忽  
夢人語曰爾母非人肉不可愈良珥瞿然即割股以  
進母病尋愈已而父珍年七十病篤復割股如前亦  
尋愈後父母胥年八十終邑令趙學使高給扁旌焉  
馬雲靜樂人事母孝母嬰病醫卜罔效奮然起曰一死

以治母病尚不辭况未必死乎因鼓刀割股以進母食之立愈人謂為孝感縣令歐鴻給以扁

代州

漢

范隆生時父適亡又四歲母亡悲哭哀慄感動行道後為大鴻臚

南齊

解叔謙字楚梁鴈門人母有疾叔謙夜於庭中稽顙祈

禱聞空中語云此病得丁公藤為酒便差即訪醫及  
本草註皆無識者乃求訪至宜都郡山中見一老公  
伐木問其所用答曰此丁公藤療病尤驗叔謙拜伏  
流涕具言來意公以四段與之併示以漬酒法叔謙  
受之顧視其人不復知所在依法為酒母病即差建  
武初以奉朝請徵不至

北魏

陸印歷官中書侍郎父喪哀毀骨立高澄時鎮鄴詣門

慰免之母為上庸公主教諸子以義方印雖創巨痛  
深出於天性克遵母訓動依法度朝廷下詔褒美改  
所居為孝終里繼遭母喪哀慕憔悴遂成風疾弟搏  
卧病臨終語家人曰兄羸病若此搏死不可使聞哭  
聲懼致感動及祖載家人方始告之印一慟而絕弟  
彥師亦以行檢稱叅襄城王旭軍事父艱去職殆不  
勝哀共印廬墓鄉人重之率就墓側存問焉

金



游完大定初年歲荒完日賑贍三百餘口冬給貧人衣  
五百套春秋以家財募人平治道塗二百五十里北  
至太和嶺南至石嶺關

劉貞世居五臺縣洪標村其劉陽勝劉行俱元統年進  
士適丁世亂遂隱不仕貞領鄉薦篤行好學有聲天  
輿間元師南進金民潰亂逃竄惟貞并父義固守謂  
鄉人曰為臣死忠為子死孝汝等缺食吾盡給之慎  
勿輕動里稱為惠人

元

王居敬與弟居智居信俱以孝稱父德順歿同廬墓側  
三年人稱一門三孝子

皇甫世忠性孝母卒廬墓盡哀自祖而下封墓高丈餘  
皆自築手為血裂州上其事未旌而卒士民悼之

明

高智甫洪武間大饑夜獲偷兒與粟遣之孫文欽並鄉

薦

梁弘正統間蠲賑旌門又李斌石公廉李志厚郝士榮  
武士榮天順間以蠲賑授七品散官

李斌代州人天順中輸財助官賑濟旌義民

孫紹光弘治間領鄉試第一舉進士選庶常母卒廬墓  
三年後以檢討歸卒人爭悼之詩古文雅為時所推  
張定一云定舉舉人累官貴州參政所至有聲知馬湖  
時剖奢楊兩宣慰不決之獄先是土官有餽金銀器  
覆以米麵者悉却之事母及大母著孝名妻崔死不

再娶兄弟八人俸入與均友愛倍至

王汝敬進士官行人亢直不容棄官歸養親卒廬墓所  
雨雪凍死

魏登高父客遊患病載之以歸號泣走千里問侍不懈  
父尋愈

孫鳳代人察地知泉令疏渠溉田千頃家嘗獲盜慰遣  
之終不言其姓名子岐鄉薦

張令聞弟令名俱諸生祖貞由貢生任曲沃訓導父本

順亦貢生甲申二月賊陷太原遣將徇代令名謂令  
聞曰時勢如此招忠義以遏賊衝力不能也反面事  
賊吾不忍自古寧有不死之人哉令聞曰恐遲則不  
得為明朝鬼矣具衣冠泣拜孔廟中指明倫二字以  
止勸者歸即哭拜其母曰兒等不敢偷生以玷先人  
惟是不能終養為不孝有長兄令德季弟令譽在幸  
勿為兒痛也置藥酒中弟兄飲畢長吟曰勁草疾風  
知大節貞松寒歲識冰心遂卒賊聞之曰義士也相

戒勿犯其家

石會五臺人性孝居喪盡哀前後廬墓六年子崙庠生  
孝亦如之又諸生王一中并解雯俱以廬墓稱孝

陳翱王璽王瑀韓勝傑張懋楊宜春捐粟賑荒賜冠帶  
胡彥質彥卿邊永瑞捐修學宮共約千金

劉子實五臺人拾還遺金妻張避礦寇率子婦孫女投  
崖皆得不死其崖石上有女履跡咸謂神效

按府縣志作子

寶

王鵬翼五臺人四世同居帷薄肅然

張三光諸生家極貧與妻宮氏竭力事親後旌表

劉寅母病禱神走千里病尋愈父疾斷髮供神願以身  
代父疾亦痊

王斐事親孝典衣供甘旨嘗遭水患負親出溺兒女啼  
號不顧獲旌表

韓鐸叔士奇官副使家居為盜所執奮槌逐之士奇獲

免陽曲周文端為作義夫傳

按府志云太原  
王文端作傳

李方實崞縣人事親孝父卒絕葷酒穴居墓左畜二犬  
有所需繫牌犬項遣歸家人率如書給之

王貫崞縣人事嫠母張至孝母卒哀毀廬墓有白兔烏  
鴉之祥又曹子溫賀多壽弓一中王猷俱以廬墓稱  
孝

郭紹鳳二歲喪母事父登高繼母楊氏無違言父病篤  
焚香祝天絕粒三日父果痊人咸稱為郭孝子

楊資崞縣人捐金三百兩完官賦得旌表又石盤代償



民逋張存智還金輸賑閭俊鑿山架橋俱有義聲

王尚質貧甚事嫠母孟曲盡孝養母病日夕號天如嬰  
兒病尋愈事兄亦恭謹人稱王孝子

國朝

馮亨期代州人幼喪父迨壯議析箸裁取十之三姜逆  
之亂州人劉遷謀襲城姦匪將為內應亨期知之密  
白當事為畫城守方畧賊夜至以有備不敢動既知  
謀出亨期集衆數萬設長圍而殺其猶子於城下亨

期捐家貲募死士乞援雲中三遣乃達城獲全嘗自  
維揚返聞有負官錢就繫者立解索贈之無吝色後  
巡撫白如梅廉其實批祀鄉賢祠

保德州

宋

趙寧十世同居家至數百餘口治平間知州折繼祖奏  
請賜米五十石絹五十匹特敕旌其都為義門至今  
仍之

元

狄元昌字世昌宋武襄公青之後其曾祖順望祖思夏  
父寬豐財濟人昌善騎射慷慨樂施求者予不少緩  
有不能償者輒焚其券曰吾身後不可令子孫徵負  
於人術士相昌多陰德後可高其門果得子八孫十  
二中有大顯者以孫東山貴贈中大夫兵部侍郎上  
騎都尉追封天水郡伯宅墓俱在西莊

明

張綬歲貢母卒廬墓三年在國學奏准保德河曲糧草  
永不起運祀鄉賢又閻忠傳文俱歲貢養親不仕

陳天和與弟天機同居五十載每有勞苦和率先之

吳學禮捐立漏澤有司給冠帶

高聊年十九刲股愈親疾李孝廉為之傳

任邦經諸生嘉靖間虜夜至村外二里許有窖險可避  
兵令三子他走自扶老母及妻藏窖中被獲佯曰從  
營惟所命獨母年老不能行乞勿驚母與妻並得免

邦經從營次日以死拒賊賊殺之

劉天爵河曲諸生少孤事母至孝五十載如一日母卒  
哀毀成疾時作夢語曰隨母去也遂殞又有苗鳴陽  
亦以孝聞

郝有玉河曲人籍陝府谷為諸生父與某甲合貨貿易  
甲病篤以百金付其父曰俟兒能立始畀之人莫知  
者頃之甲卒父亦病將死呼有玉告其事並指埋金  
處後甲子長以金還之河曲尹田思孔旌其門白君

琬為作傳惜失名

楊應璧河曲諸生流賊王嘉印亂率眾擊之面中一矢  
為賊所逼墜城死

郭邦奠郭磐崇禎間奮勇同謀欲殺賊首王嘉印事泄  
被殺知州王國珪嘉之為繪二像於廟壁

康明秋貧丐住東門外半坡賊猝至時城門開秋急登  
屋以瓦擊之賊稍退城中乃設備事平給賞不受扁  
曰奮勇擊賊

苗根千河曲人鬻炭為業流賊據河曲聲言官兵殺良  
冒功民懼不敢出根千陰藏制府諭帖徧散城中民  
始歸正賊覺欲殺之根千大呼曰軍門有諭出城者  
活在城者死汝等速去賊折其首又趙調元從中丞  
宋統殷復縣城亦被賊害

國朝

崔耀順治七年牛賊據城耀及揚振林張國申等十八  
人斧斫牛首奪門投誠

山西通志卷一百四十四



欽定四庫全書

山西通志卷一百四十五

孝義五

解州

北魏

閻元明少而孝著鄉里孝文太和五年除北隨郡太守  
元明以遠離親養悲慕母亦慈念喪明元明哀號上  
訴請歸養母目復明刺史呂壽恩列狀上聞詔州郡

表為孝門復其祖調兵役令終母年後母亡服闋心喪不輟每當忌日悲慟感及傍隣昆弟雍和百口同居

後周

張元芮城人年十六祖失明元晝夜祈禱一夕夢神人以金篦療祖目越三日祖目瘡因舐之果明後人立祠謂之張府君廟

隋

鈕因字孝政性至孝後周武成中父母喪廬於墓側負土成墳廬前生麻一株高丈許圍之合拱枝葉鬱茂又夏常有青鳥棲其上因舉聲哭鳥即悲鳴時人以為孝感武帝表其閭擢授甘棠令開皇初卒其子士雄少質直孝友喪父亦廬墓側負土成墳庭有一槐甚鬱及士雄居喪樹遂枯服闋還宅槐復榮高祖聞之嘆其父子至孝下詔褒美號其居為累德里

唐

張琇父審素以儻州都督被誣為御史楊汪所誅琇徙  
嶺南久之逃還殺汪于都城繫表于斧以訴父冤吏  
捕以聞張九齡欲活之明皇謂孝子不顧命殺之可  
成其志臨刑色自如曰下見先人夫復何恨

張志寬隋末喪父哀毀骨立為州里所稱賊帥王君廓  
屢寇掠獨不犯其廬鄰里賴而免者百餘家後為里  
長于縣一日稱母疾急求歸令問其狀志寬曰若心  
痛則知母有疾矣令大怒曰妖妄之辭也繫於獄馳

驗其母如所言令異之慰諭遣歸後丁母憂廬墓側  
負土成墳鳥巢於樹志寬哭臨鳥輒悲鳴高祖授以  
員外郎散騎常侍以旌表其門閭

曹文行與孫懷應相里志邵法同皆於事親居喪著有  
孝行者任君義衛開皆數世同居者天子俱旌門賜  
粟州縣存問復稅有授以官者見唐書

衛元表南鍛事親居喪著孝行旌表門閭賜粟帛州縣  
存問復賦稅

都兒諫議大夫夏縣陽城奴也化城德方介自約或哀其餒與之食不納後致糠覈數楮乃受

宋

董孝章大中祥符時十世同居又有潞州邢濬八世同居隰州趙友七世同居所在請加旌表俱從之仍蠲其課調

樊景溫陝州芮城人兄弟異居積年大中祥符中樗樹五枝并為一感其異復聚鄉人稱其雍睦

劉太為醫助教居親喪絕葷者三年司馬光稱為今士大夫所難能作序賻禮

劉永一太弟孝廉謙謹事父母人無間言昆弟友愛奉養服勞終身不倦居鄉里遇有睚眦啓釁者輒勸諭使歸於好熙寧初巫咸水溢民多溺死永一家臨大河每日持竿立門外見他人有物溺水者輒為摘取還之鄉人負債不償立焚其券

婁應字循之解州人少負智勇尚氣節祖興起家於解

不數年遂致富盛元豐間虜屢犯邊朝廷出師深討  
應為解戶籍首計家產過一縣之多科率比他處三  
倍應以罄產為誓言逮邊事少寧產已隳蕩八九未嘗  
有纖芥怨尤復自發憤整理家業不數年十倍於前  
會朝廷嚮爵以贍邊備應輸貲授將作監主簿子三  
人授授益州助教絢應進士舉官修武郎純聰明豁  
達有父風孫康慶州助教

司馬浩少攻詩凡八上不遇遂絕意進取專治家事為



人魁岸慷慨尚義於宗族恩尤篤司馬氏累世同居  
口衆產寡浩力營衣食贍之均一無私孀婦孤兒皆  
獲其所數十年無怨言祖墓迫隘族貧尊卑長幼前  
後積二十九喪浩於祖墓傍相地為新塋悉舉而葬  
之弟子里早孤浩識其雋異教督甚嚴其後卒取進  
士仕至太常少卿所至著名先是鄉人導涑水溉田  
利甚溥歲久岸益深峭田旱不足輸租浩率鄉人請  
於令築埭下流復資其用溫國公為撰墓表嘉靖十

七年入鄉賢祠

司馬沂夏縣人曾祖林祖政父炳皆不仕累世同居食口甚衆貧無以贍沂幼孝謹父兄悉以家事付之儉勤以成其家父兄甘旨不缺時有餘力及其鄉人沂以惡衣蔬食終身王安石撰墓表稱其謹身節用以養父母而道行於妻子嘉靖十七年入鄉賢祠

周文燦其兄嗜酒仰燦為生兄或酗毆燦隣人不平而唁之怒曰吾兄未嘗毆我爾何離間吾弟兄也

蘇慶文夏縣人事繼母以孝聞母少寡慶文懼其妻不能敬事每戒之曰汝事吾母少不謹必逐汝妻奉教母得安其室終身

臺亨夏縣人工畫元豐中修景靈宮調天下畫工詣京師選其優者待詔翰林畀以官祿亨名第一以父老固辭歸養閭里賢之

金

張錦河東人大定十年尚書省奏錦自言復父仇法當

死上曰彼復父仇又自言之烈士也以減死論

張仁檝東漢河間相衡之後世為荊州從事中郎將關  
內侯征南將軍北郡太守宣威將軍等官明昌三年  
有司以仁檝四世同居事聞詔表其門免族差二年  
太常博士毛麾為記云

元

趙天爵字伯廉嘗為吏多平反惇行孝弟治家甚嚴三  
子皆頎然玉立母喪廬墓三年父繼喪又如之惟蔬

食菜羹不茹酒肉不與妻妾見有司以聞詔旌其門  
復其身

王天爵字仁傑家饒於財有善行以粟貸人年饑但取其本凶則已之鄉里咸稱義士值始生辰輒寢苦一月

明

劉復禮安邑人洪武間兄復初里選中人才時兄未有嗣復禮願代往授沂水邑丞令干紀丞坐失舉罪曰

為臣若此何以自白且如後代何遂不食死七世孫  
澤商于淮有負貲累千金者貧無以償遂焚券

周遜夏縣人洪武間任分水主簿母喪廬墓三年又諸  
生秦應槐亦以廬墓稱孝

張斌安邑人永樂間募士北征兄當遣斌曰兄老無嗣  
請代往後以扈駕功授錦衣衛百戶辭歸養親兄果  
有子斌子祐孫璣璣胥顯

呂讓字志謙解州人永樂間貢生事親以孝稱

張普圓安邑人永樂中以孝被旌

李福榮解州人正統四年以捐賑旌門

陳孟芝芮城人母卒廬墓寄宿樹下鄉人憐其貧為置一室朝夕不繼胥安之又李捷科亦以廬墓稱孝

李文質南思忠胥芮城人正統間輸粟賑饑旌義民又李沛生亦以輸賑稱義

張璩夏縣人弘治間賑饑

呂完安邑人正德間父歿廬墓常有數狼伴之縣令疑

其事黎明詣墳驗視果如人言

王旬解州人好學明義性克孝嘉靖乙卯地震被壓甫  
出即問祖宗神主嘗建祠堂歲率子弟修祀事

張綱甫安邑人嘉靖丙辰輸穀八百石以賑荒

袁繡字廷器解州孝廉昭之子敦厚遜讓父命析居貧  
產惟弟所取概不問

張英字居傑解州歲貢以孝友稱官兵馬司指揮陞淮  
安府通判有惠政子璠服父喪泣血十日而卒



閻親字本登解州貢入太學日夜思親遂馳歸終身不仕

侯加采字亮余解州人由進士累官四川遵義副使初任順德時聞母病即解官歸兄病如之居官有廉仁聲

呂鳴韶字宗舜解州人事繼母撫諸弟以孝友著由歲貢任元氏教諭出俸濟貧生人競稱之

李希稷字又田解州人素行端謹事繼母撫孤姪以孝

友稱由歲貢生任大同府教授

譚應春解州人幼孤力耕事母以孝聞又呂論事母趙曙居喪人咸稱之

侯大本解州人撫孤賑貧拾還遺金鄉里稱之

李通拾還遺金著義聲

李鼎新安邑武舉好義樂施事孀母至孝慮違色養終身不會試

景于岡安邑諸生事孀母以孝稱奉旨旌表

劉鑑安邑烈婦李氏孫翰穀得官母病危沐浴請禱割  
左腋肉作羹進之頓愈逾二紀始卒

景蕭安邑人性孝父病危日夜悲號割股作羹進之疾  
尋愈

喬安安邑人侍父伯泰疾躬親湯藥衣不解帶者百餘  
日父卒哀毀廬墓絕葷酒寢苦塊負土成墳父嗜桃  
李于墓旁種百株甫三尺而花實母王卒廬墓如前  
塋中穀生雙歧桃李秋榮

王鳳安邑人母卒廬墓有白狼伏墓左鳳不懼忽越牆  
陷竇中以手扶出之狼再四回顧自後時來復歷三  
年

李瑛安邑人廬父墓三年絕甘旨擇隙種瓜備時祭孟  
冬猶生人謂孝感

張光射安邑人事親孝晨興必請所食父游止飲常預  
授錢酒肆少遠則攜家膳從之昆弟有無與其妯娌  
化焉事長睦族並有仁讓聲

景嘉會安邑人學優行高事親能孝以弟嘉柱之嗣病  
故日夕悲慟竟卒

曹良良曹中丞于汴曰吾族老僕曹寧其子良良垂髫  
時以搖箕為生每得毫釐則為父母具美味稍長傭  
工其父母不乏酒肉嗟乎此非孝子乎哉未可忽也  
為作良良歌歌曰曹寧夫婦病且老有子良良行孝  
道苦筋竭力得毫釐奉養雙親常溫飽我雖我冠為  
朝臣睹此美行感懷抱世上豈乏我冠人上天下地

能論討妻羅子綺愁不足不為父母添布襖嗟爾良  
良是吾師願爾多壽多財寶

劉允寬運學諸生事母四十年母嗜瓜豆身任桔槔母  
病孿夜哀痛竟得愈子廉民亦諸生遊曹于汴門母  
喪廬墓著六言訓正須辨無無齋集行世

曹希舜勤儉好禮又楊吉士性耿直時號楊公平

劉春力農課子解紛周急人並高之

楊瑄安邑人少孤貧拾金還主孝事孀母官齊河教諭

遷新安令冰蘗自持卒於官囊橐蕭然士民痛之

王承家運學諸生孝事孀母撫養孤甥以子貴封國子  
監學正祀鄉賢

李茂春安邑選貢官無極令母塲廬墓三年又王畿奠  
歲貢官廣昌教諭吳琨諸生亦胥廬墓

張啟蒙運庠諸生事母孝母壽至九十有七歿未逾月  
以哀毀卒

劉近寬安邑人有孝行官京倉大使以清廉著又路旁

穿井植樹行人賴之

郝本彰安邑人事繼母撫異母弟孝友備至家貧好學  
每喜勸人為善晚別妻子不知所終

宋登雲運庠諸生事母孝母八旬失明日夜號泣得名  
醫療之明如舊壽至百歲

郭國泰山海關都司辭官養親撫孤姪如己子庚辰大  
侵出粟數百石以賑族黨又劉有占任薊遼副總兵  
是年亦捐貲賑饑



解通夏縣人應召言吏部選法不公降河泊所大使到任歸處家雍睦五世同居又李棠四世同居

曹欽夏縣人弟婦寡而無子病且死欽謂子曰伊有諸女家貧任分給慎勿與聞諸子尊欽言無敢爭

曹恭夏縣人為童子師拾還遺金數百兩行田間遇盜禾蔬者亟避之

張憲夏縣人與族叔瓚俱以淳謹化里人憲娶瞽妻生二子終身相敬不衰

孫天濟夏縣人母白邁疾弗愈剗股作羹進之遂瘳

楊休夏縣諸生性剛直克孝友廬父母墓凡六年卒於

墓側

張孝夏縣諸生母喪廬墓李樹重花尤好掩胔骼以忠  
厚稱卒後里人立石裴介里以表之

衛九錫夏縣人父歿廬墓不御酒肉歲時必哭泣聞者  
悲之

馮得意夏縣人幼孤事母及祖母皆以孝稱待族隣有

恩義尤精外科活人甚衆有致謝者却之

劉漢臣夏縣人性孝母病嘗糞居喪不如鹽菜服却溫  
絮人稱其孝

馮珊夏縣人嘗拾還遺金幼孤與叔同居析爨時讓多  
取少叔卒愛弟尤篤迎養寡姨助甥完娶人多稱之  
趙克己夏縣人親疾百日不解帶內外艱六載不御酒  
肉官靈臺訓導遷廊州學正胥有聲

裴紳夏縣人善治生好助人婚葬戊子壬辰捐粟賑荒

至千石辛丑寇變輸金二百五十兩豆穀三百石馬  
數十匹蒲商某假貨貿易被盜懼不敢歸紳曰全軀  
足矣貨何足云兄純為諸生尚義好施子錫鑰並有  
父風旌獎

馬杉夏縣人事親極孝父痿痺日侍父側夜則臥牀下  
父盥櫛時拭污穢不少倦父歿哀毀踰禮哀老拜墓  
號泣不輟撫弟有恩弟亦以孝聞

盧應詰夏縣諸生歲凶發粟二百石貸邑人又建義塾

八十楹延師教族里子弟胥給膏火資族子某貧且廢學及邑諸生某力不克婚葬胥助之義塚橋梁修建尤多

張文明夏縣諸生父喪晝夜柩側者二年既病猶哀號不輟事兄謹居鄉亦著仁聲庚辰歲荒出粟辛巳大疫聘醫給藥全活甚衆

張瑛夏縣人官榆林永豐倉大使副使有薛春鬻女得銀十兩償糧亟贖還之後陞巡檢道出任平女已適

舉人劉寧父女肅謝酬金堅不受壽八十餘端坐而逝

胡以成夏縣人好周急或竊其田禾亟避之鄰有新婦失金釵翁姑急索倩工製就給還其家俄獲釵驚問以成曰失釵事小倘致不測所傷實多姑為此以解耳其人愧謝

齊忠義夏縣人母疾捐修石橋以求愈後屢毀屢修無怠色又有馬上德建朱呂橋里人劉養勇助之

楊有成夏縣舉人令完縣以清廉著居家孝友與弟同  
爨終身誨四姪一子胥成名家產均分

楊自升夏縣人事繼母撫幼弟稱孝友由舉人官滄州  
牧時隣封多殘破升獨捐貲鼓衆堅守城賴以安宦  
歸大饑賑粥多全活

王漢夏縣人拾錢不得其主以造橋梁盧存義拾金還  
主備粥賑民又胡以修賈守約姜一貫張楫並以還  
金稱義

郭伉夏縣諸生父母相繼逝葬後猶獨居不入私室者  
三年人稱其孝

裴應時夏縣人性孝友母疾朝夕侍養躬親湯藥二十  
餘年其周貧修學賑荒俱有聲

王錫福夏縣人家世清貧適潦水突衝祖塋赴險拾骨  
葬祭盡禮人服其孝

王璋平陸人父歿京師負柩歸葬事繼母克孝撫幼弟  
友愛三世同居時論稱之



趙宗岐父太學生仲德早卒事母王以孝聞母卒廬墓三年又李志和陳守職胥廬墓六年

毛汝尹平陸人事嫠母撫弱弟稱孝友母喪廬墓三年王國泰號雲峰平陸貢生幼孤兄應泰撫育之同爨五十年事兄嫂謹家無私蓄訓姪有義方

崔榮嘗三詣闕下奏免荒糧詔從之

李宏平陸廩生設社學捐官租輸賑掩骸捐築外城代銀納馬為善不倦

趙綦平陸諸生不與人較安貧力學以禮自持

崔吉字天祐號條陽平陸人有至性居憂六載哀毀骨  
立里人化之官華州同知祀鄉賢

王濟民字字元平陸舉人令欒城丁內艱哀毀踰禮至  
嘔血服除改知河內所在有聲贍族尤篤

李錦芮城歲貢親喪廬墓六年卒于墓所子澤歲貢生  
孫柄並廬墓柄亦卒墓所

任紹統芮城人出穀千石賑饑勅令入監以旌其義

靳茂芮城人年七十夏月負父澡浴疾嘗糞甘苦里婦盜籬薪見而徐呼曰勿傷汝手缺薪何不告我也

李孝芮城人父疾禱於神廟刲股進之疾遂愈又趙承祚亦以刲股稱孝

郭維藩芮城諸生性至孝事繼母撫幼弟人無間言鰥居五十載壽至九旬

任家聲芮城諸生知府裕統子母病衣不解帶者年餘及七七日弗食毀瘠不起天啟間同妻並旌孝烈

申我欽夏縣諸生幼孤事母撫弟稱孝友盜夜逼祖寢  
亟擲衣飾以餌祖遂得脫崇禎十三年以母命給族  
黨麥全活甚衆賊至與弟我猷効死衛母賊感其孝  
而去子昌言孫翀胥登賢書

王肇益安邑諸生鳳翔司理家禧子也闖賊索餉代父  
受刑凡三日遂死賊憐其父而釋之

侯佐字東俾解人崇禎間進士任建平合肥令俱有能  
聲擢刑曹轉吏曹以公恕間在籍遭亂急父難死之

祀鄉賢

國朝

蕭熙載諸生順治乙酉避闖難父被圍投井號泣從之  
並死焉妻蘭氏撫孤壽八十有四

劉曰晏解州諸生事親孝順治己丑姜瓖之變寇且至  
依父不去賊嘆其孝而釋之比歿哀慕不忘八載不  
入妻室

李琮生字藝山其先同州人宦解州遂家運城世理鹽

筴後業儒琮生學陶朱術尋復理鹽筴抗言鹽政多  
所建白有謀割地梗鹽法者拉蘆商構訟琮生赴闕  
上書竟直其事

秦章夏縣人年四十無子兄文諸生亦無子弟錦有二  
子然皆孩提也順治十一年餘孽夜肆掠章與妻馮  
棄其幼女各負一姪踰牆走賊射之走益急質明歸  
視女故無恙文先為賊殺至是錦亦烙死文妻及女  
皆掠去章泣訪所在鬻產贖之婚嫁悉資焉章後亦

有子

負碩字鴻聲平陸人幼孤事母最謹由恩貢授黃岩縣丞攝縣篆值閩逆催科撫字兩得其道邑舊俗人死多不葬捐貲瘞者不啻萬數

負鼎甲平陸諸生兄亡弟歿撫姪胥至成立嫂薛得以節終並其力云

張志尹芮城例監康熙十四年協濟秦省捐粟三千石又平治通秦大道三十里又嘗鑿井建橋施茶粥焉

令狐種平陸人樂善好施村有洪澗盤旋病涉每歲修橋以利行人自明隆慶以來百數十載子孫曾玄歷五世仍修不輟

張冠玉芮城貢生事親能孝康熙三十一年大疫捐棺不繼復施葦席五百餘掩之

杜化豹平陸人兄弟早亡撫諸姪如已子周貧恤寡善行頗著

李甲捷芮城人與妻韓氏俱有孝行父母繼逝幼弟三



人一七歲一四歲一甫週胥異母弟也夫婦養且訓  
胥克成立甲捷老無子爭迎養及卒各立木主祀之

絳州

梁

裴子野性至孝幼居祖母喪哀慟如成人父疾禱請備  
至涕泣沾濡父遂愈及歿殮葬盡禮其墓哭處草為  
之枯有白兔白鳩馴擾其側

北魏

吳悉達兄弟三人俱幼父母為人所殺四時號慕感動鄉隣及長為報仇避地永安兄弟同居四十餘年讓逸競勞閨門和睦鄰人孤窘者輒解衣輟糧濟之鄉閭五百餘人詣州請刺史表贈其父渤海太守後圖改葬失父舊墓所晝夜哭禱于神出行所履地忽陷得父銘記因遷葬宗祖以下三世九喪哀毀如初有司奏聞旌其閭北史列孝義明永樂間與裴敬彝並傳

裴安祖河東聞喜人少聰慧年八九歲就師講詩至鹿鳴篇語諸兄云鹿得食相呼而况人乎自此未曾獨食弱冠州辟主簿人有兄弟爭財詣州相訟安祖以禮義責讓明日相率謝罪州內欽服之後鄉人勸其仕進安祖曰高尚之事非敢庶幾但京師遼遠實憚於棲遲耳閒居養志不出城邑後孝文幸河東存訪故老安祖朝於蒲坂帝與語甚悅拜安邑令以老病固辭詔給一時俸以供湯藥焉年八十三卒於家

裴修字元奇駿子清辯好學歷位秘書中散主客令累  
遷中大夫兼祠部曹事斟酌故實咸有條貫卒諡曰  
恭伯追贈東秦州刺史修早孤居喪以孝聞二弟三  
妹並在幼弱撫養訓誨甚有義方次弟務早喪修哀  
感行路愛育孤姪同於己子及將異居奴婢田宅悉  
推與之時人稱焉

北齊

裴訥之字士言佗第五子純謹有局量弱冠為平原公

開府墨曹掌書記從至并州其母在鄴忽得心痛訥  
之是日不勝思慕心亦驚痛乃請急還當時以為孝  
感文宣幸晉陽留為齊帥領東宮管記轉太子舍人  
奏中書舍人事坐杜弼事免官卒大統中追贈平州  
刺史

北周

梁慎其先安定人官晉遂家焉九歲善文辭天性至孝  
授洛川曲周縣主簿親歿泣血設影供養出告入面

不異生時墓側結廬負土益塚時有鳩翔醴泉之瑞  
絳州刺史孟說奏狀勅下旌表其門弟九思甫能言  
即知孝親敬長後以孝弟徵岢嵐州錄事參軍操履  
清潔不期月教化大行尊引退晨昏事父母遺像有  
如生日

裴漢性不飲酒而雅好賓遊父歿後遂絕遊從不御琴  
瑟歲時哀慟而已撫兄弟子情甚篤位車騎大將軍

隋

裴子通仕隋為大中大夫哭母喪明白鳥巢於塚樾兄  
弟八人皆有孝行詔表世為義門裴氏

裴叔卿景鴻子博涉有孝行時號裴曾子為隋貝丘令  
子神舉神符

唐

趙師舉絳州人父為人所殺師舉幼母改嫁仇家師舉  
長晝為人傭夜讀書久之手殺僂言人詣官自陳高宗  
嘉其孝赦之

王景暉夏縣呂崇茂反宋金剛又寇澮州景暉率鄉黨千餘家據險抗賊卒獲保全太宗嘉之命檢校桐鄉令不受改為驃騎將軍又不受高祖聞而徵之及見勞之曰卿固守忠誠克全鄉曲國有常典所以授卿每辭不受何也景暉對曰桐臣鄉也拒逆臣分也不敢邀功故辭高祖善其對封桐鄉男加位開府

裴敬彝絳州聞喜人子通曾孫七歲能文章性謹敏宗族重之號甘露頂父臨黃令智周為下所訟敬彝年



十四詣巡察使唐臨直枉臨奇之試命作賦賦工父  
罪已釋表敬葬於朝補陳王府典籤一日忽泣涕曰  
大人病痛吾輒然今心悸而痛事叵測乃請急倍道  
歸而父已卒羸毀踰禮乾封初累遷監察御史母病  
醫許仁則甦不能乘敬葬自為輿往迎居喪詔贈縑  
帛官為作靈輦終服以著作郎兼修國史歷中書舍  
人太子左庶子武后時酷吏陷之沒於嶺南

王義為御史中丞裴度駙盜害宰相武元衡又擊傷度

首哄導駭伏獨義持盜大呼盜斷義手度墜溝得不  
死而元衡竟不免於難

王助字子工通孫七歲喪母悲號隣里為泣居父憂哀  
毀骨立為監察御史裏行初勔勵皆著才名故杜  
易簡稱為三珠樹其後助劾又以文顯劾早卒福時  
少子勸亦有文名

高霖皇稷山人秀岩子以孝友直方聞於時先任開府  
儀同三司檢校國子祭酒兼御史大夫充成德軍節

度使兼都虞候經畧副使丁父憂竭產盡心徒跣扱  
衽扶柩自幽陵歸葬廉城

王質通五世孫少孤客壽春力耕養母講學授徒無仕  
進意逾四十始擢科累官諫議大夫以直諫出為虢  
州刺史後為河南尹終宣歙觀察使清白畏慎所至  
有惠政民胥德之

王操邵元同張衡曹存勳李文褒董文海李文秀張仙  
兒張公憲張子英皆事親居喪著孝行旌表門閭賜

粟帛州縣存問復賦稅有授以官者

元

姚子智居喪廬墓見元史孝友傳一作好志

呂祐字伯通晉安人至正二十六年城破有卒入室脅其母索貨不得揮刃欲斫之祐急以身蔽母奪其刃指盡落傷仆地良久而甦開目視母曰母幸無恙死可無恨遂瞑目而死

唐義橋三十喪父母五十猶衰麻常建橋於稷山縣南

汾水上

劉信字仲寬穎悟非常少孤事母至孝或勸之仕曰余夙喪父今以身事君如事母何居鄉無小大悉持以敬人有爭訟難決者詣請平之母歿隱居龍門讀書終身後旌表其門

段承祚謙和好禮動止有則任國學正尋以母老歸養屢徵不起教授于鄉嘗有隣婦失金環疑取火承祚家時失之不辯而償妻有難色承祚曰恐逼人命耳

後婦得遺環于漿甕中人服其德量

明

侯裕福絳州人父懷玉病危號泣絕食祝天求代父病以愈尋被牛舐腸出氣絕隣人納而縫之遂甦時謂孝感事母張尤謹母卒同弟裕祿哀毀廬墓門旁枯井亦生甘泉

鄭思絳州人正統間以捐賑旌門又辛思恭梁瑤耿維哲亦嘗輸賑焉

李邦教聞喜人守母王殯十有五月哀毀蔬食常如始喪比葬廬墓獨居十三月服闋親黨迎之始歸又有呂辛陵親喪亦廬墓

張林李興賈金並聞喜人正統四年胥以捐賑旌門  
丁貴垣曲人成化間以捐賑旌門

李興垣曲人事嫠母張孝侍疾嘗藥夜不就寢比卒哀毀骨立負土成墳廬墓側黃白二犬馴擾不離前有旱橋溝忽湧清泉人名孝子泉成化十七年旌門

裴增稷山人孝事繼母慈育孤姪嘉靖間旌門

陳璽絳州人父恕任貴州叅議卒於官扶柩歸葬廬墓  
終喪事間旌表後以貢任隆慶州州判

張益絳州人父聰客死扶櫬歸每至逆旅依櫬露宿風  
雨弗移弟增毆人死益憫弟無子為代其罪竟得免  
許河城南創建浮橋州人便之萬曆十四年偕許敦實  
輸金助賑

劉有學字雨河河津人同弟有容並領萬曆庚子鄉薦



雅負文名母病不上春官執喪時淚盡血出事詳袁  
了凡傳中祀鄉賢

吳國相河津人萬厯間拾還遺金以義稱

劉承雲河津人官光祿署丞萬厯丁巳捐賑至二千金  
旌門又李子隆任直任寬柴彥解得永普安然薛原  
修吳有文俱以捐賑旌義民

趙軌河津人歲荒輸賑二千石生平資助婚葬者七十

餘家

段時盛梁從高應高陶天長胥刲股愈親疾

李國定絳州增生事親孝歿則刻像奉之每飯必祭一  
如生存詳見旌孝錄

趙統絳州人賈西寧嘗鬻木綿數萬斤僕潛輕其衡即  
折衡而逐之積粟減值以濟饑不能償者胥貸除又  
拾還黃金數斤人以為難

張國紀絳州人業賈周忠介被逮時緹騎索金即投緡  
船中倡諸賈攸助之僦居三林有謀囊索盜者責以

大義復出私囊周之由是鄉人獲免難

孫統絳州人客三原或貸金五十如約償還子母已入惻然憫其苦為焚其券與之又捐金賑饑市廢掩骼秦人德之

王弘先絳州人七歲能文十二歲補弟子員淹貫經史母疾衣不解帶者月餘母卒以哀毀亡

張貞教絳州諸生時有宗室逼居學宮欲毀牆垣以通馳道與弟名教奮力爭之禍幾不測白諸當事事乃

平後由歲貢授澠池訓導

衛登強絳州人好義樂施嘗為族人代納丁糧時無子相士謂有陰騭紋年五十當舉子已而果然又衛聚德亦置義田供族逋賦韓傑惠濟族人亦置義宅

陳鎮明字潛夫絳州人好詩書隱於商遇困乏者力周給之嘗著復性語以自娛見三晉語錄中

張真字子純絳州人遊雲間晨瀉盪水地隙中受水甚虛怪而發之有錢一罌遽掩之里中亦以孝弟聞

任宗陟絳州人少以舅党冰壑為師志洛閩學事繼母能孝家貧資脩脯以活有得悉以供母氏不敢私冰壑雅稱之

衛宜信字爾紳絳州人歲貢生讀書不事口耳雅斲力行事父母至孝家雖貧甘旨不少缺居喪不飲酒不如葷三年不入內室嘗於稷山縣道上建茶亭行旅賴之

李芳聞喜諸生幼孤事母譚惟謹母病禱天求代比卒

哀毀廬墓穀麥並多歧穗

解良溫聞喜人孝事繼母拾還遺金又有溫敞亦拾還

遺金

溫洗字汝勵聞喜諸生七歲就外傅長跪誦書曰僧家  
誦經且然何況我輩幼孤事兄如父析居後一日不  
見亟候之遇諸途必趨揖問所向雖耄不衰嘗之南  
橋見樵夫投水問之為鬻布被盜不敢歸見母紿曰  
我得其人矣引取妻所績布以與之行田間見盜果

者在樹疾退而匿拾金不昧寬洪不校詳見光祿文  
翔鳳志

解省身號東野聞喜人謙和恭謹每朔望聞木鐸及官  
府傳呼聲雖坐臥必起肅立年至九十弗少懈

寧二翰聞喜貢生事父孝父喪事繼母有加年踰七十  
定省不少踈

楊佐聞喜貢生冬月袖扇路遇婦女輒自蔽失偶不再  
娶邑人稱為楊古

李儻字明晦聞喜人孝友恂謹母景年八十餘儻年已七十矣晨昏問視如兒時由歲貢官訓導遷學正

翟夢標字懷玉聞喜貢生工詩賦施方藥活人無算遭閹變不屈死

翟夢杰字興余聞喜人性孝友事父及繼母備極色養事三兄讓產讓財由將材官都司遷薊鎮以終養歸葉士旺聞喜人好義樂施同居五世

張學孔聞喜諸生母病剪髮斷指願以身代病果愈



楊仲李珪並聞喜人輸賑修橋以義稱

李儀聞喜人志稱孝弟力田疎財仗義

王益聞喜舉人父歿焚券以千金計周濟鄉族毫無吝

色事繼母以孝聞

王贊聞喜人篤實端方毀家救荒絕口不言人過

杜文敬河津人性至孝家貧養親備極豐潔母卒哀毀

廬墓三年

侯鶴齡河津人幼知孝祖疾侍湯藥終歲不懈母多病

因精研醫理多施方藥以乞母壽母卒齋戒三年

邵文煊字鳳衢由選貢令冠縣遷處州通判事親克孝

居鄉捐金賑荒修城多義行

張居元稷山人性至孝甫七歲即代母操薪水或從外

歸遇父睡熟跣行跪牀下竢覺乃起母姚疾篤嘗糞

籲禱以愈由貢生令贊皇乞歸終養父卒哀毀骨立

歲時莫享如生

胡澤事親克孝每食必請所欲父邁亟疾衣不解帶絕

食顛天求代疾尋愈澤少失恃哀毀幾殆父強之始  
啜粥弟甫週歲且多疾懷抱食飲者六年繼母馬性  
卞急怒則長跪竟日俟色解方起稷山人胥稱孝友  
梁蕙字若生號存石稷山人紀子廩監遙授西安府通  
判博學工詩書法揮灑入神嘗開義倉以賑饑民給  
乳媪以活棄嬰著六種吟行世

裴全稷山人父以債負羈獄中時方十餘歲傭工供食  
代父受比訊者憐之釋其父

寧學倫稷山人幼孤痛哭幾至失明事母侍疾嘗糞稱  
孝

寧桂字攀之母喪徒跣三年不食菜果不扇不爐由舉  
人官戶部郎以清節著

史三長梁廷吉胥以割股稱孝

張三綱賈日鼎胥以還金稱義

閻士堯王世勤賈王勝胥有輸賑之義

任之奇稷山人家貧盡孝母卒廬墓終身不衣衫服

范應奎絳縣諸生幼孤奉母至孝又拾還遺金云

陳讓絳縣歲貢生善事繼母年饑賑粥掩骼置祭田著  
易經說四書一得隨筆久訛一訂諸書

趙進垣曲人七歲喪父事母克盡子職母卒執喪如禮  
以孝聞

劉紹宗負米百里躬侍湯藥以孝友稱舟行值颶風炷  
香禱天得無恙

文汝衡垣曲人父三任教職獨侍左右定省惟謹比卒

哀毀骨立絕食數日葬值雪泣禱得霽葬已大雪如故

常目垣曲人性孝謹侍父廷疾湯藥不懈比卒絕食數日既葬悲泣三年泣官者三食必祭哀慕終身有思親卷

普曰仁垣曲人穎悟有才志存忠孝祖母王喪明侍奉惟謹父暉擢南臺御史護送祖母就養舟抵下邳夜起問安失足溺死寄葬江岸勒石名孝孫塚

文希韓垣曲人幼孤事母陳躬侍湯藥以孝聞痛母苦節力請得旌塾中建祠歲時祀之

文昭垣曲人母朱早寡事之惟謹比歿偕弟昶寢三年後宰鄂有治聲嘉穀數生罄俸與弟中分撫姪如子人共推之

張濟垣曲人家貧克孝每延父客竭力款洽父歿廬墓蔬食水飲一夕夢父拜大成殿即捐金助修學宮焉李義垣曲人幼孤事母惟謹母亡朝夕出入詣墳拜告

者三年

郭萬里垣曲人事母魯祖母趙定省溫清人無間言

郭元祥事父母及大父母庶母孝兄弟族黨胥稱仁讓  
常延藩掾不樂仕進個儻好施予

劉澄隆垣曲人儉而好施歲荒輸賑一千二百石得旌  
表後又荒輸一千餘石縣令喬某詣視其困存不盈  
百歎息而去

劉明垣曲人嗜讀書牧羊山中手持漢書一帙憩樹下



讀之一夕暮還遺書於野犬銜歸子盈事親克孝蔬  
果鮮味不進不敢先嘗

程君愛垣曲人家貧力學遊辛全門下事嫠母以孝聞  
趙名孕都憲載孫幼孤事母許有老萊子遺風母年八  
十艱步履特製小輿躬自舁之食必問所欲比卒哀  
毀幾絕

文登襄之子母卒廬墓三年

魯聖裔垣曲諸生父卒京邸徒步負歸途中早夜焚香

奠飯如親存比莫哀毀骨立鄉人重之

鄭元吉垣曲人傭書養母申時觀鬻菜養母時並稱為

孝子

文鴻儒垣曲人事父及繼母色養備至母卒哀哭過情  
父年九十扶持不離跬步異母弟所生四子撫養成  
立如同已出

文朝佐垣曲人幼孤事母盡孝有伯俞風

文希程垣曲人憲副皓孫賢產遜異母兄弟一日拾梁

姓白金壹劬即付還梁謝不顧為諸生以詩文自娛  
劉光薦王得民周急扶危代完逋賦族黨德之

郭從林馬服主並垣曲人崇禎間捐助軍糈尤以廣掩  
胥骸著義

王宗仁崇禎間罄貲賑饑不足則借金遠糴以濟之全  
活甚衆又有張繼美亦輸穀賑荒

柴孟冬諸生崇禎庚午賊陷村堡與子寅忠同日戰死  
又有諸生黃時度王有光張體素史官盧如棟任大

觀鄉民柴皇棟張永林原養重馬世武史國顯等皆  
被傷不屈死

盧繼芳絳縣貢生流賊犯晉督鄉兵往禦死之又有郭  
帝都諸生亦以禦賊被執不屈死

史宗禹稷山人事母盡孝崇禎間旌門

張翼舒河津人崇禎庚午舉人工文章尤勤教育及門  
多名雋士庚辰歲荒賑粟二千石有奇

趙承業聞喜人賊至獨守親喪賊欲剖棺以身護之被

殺

張綿聞喜諸生張羽義子羽卒事母吳極孝崇禎四年  
負母避賊洞中賊薰洞執母以身捍之罵不絕口賊  
並投烈焰中死

吳思聰李思誠並絳州人崇禎間輸金賑饑思聰尤好  
掩委骸云

康丕承絳州人崇禎辛巳歲大饑賑粥施藥全活甚衆  
闖賊渡河勒餉代兄丕景受刑無怨又嘗修建汾水

橋先聖廟城上炮臺城南石堤及師吳某夫婦養生  
送終諸事踴躍為之不少吝

來童絳州人家貧傭工於外崇禎間餓莩填壑歸覓父  
屍不得號泣三日絕食死

魯紹孔垣曲諸生置義田建義宅遠歷東魯扶叔柩歸  
抱疾往秦尋從弟獲之崇禎十三年捐貲賑饑

孫枝妍絳州諸生闖變索餉挺身代父父得脫賊怒加  
梃刃閱日死

韓無斃絳州諸生闖變時避亂稷山夜半賊執其父義不肯逃遂與其弟無期死之

陶冶恭介琰次子官右府都事疏乞終養承顏順志親卒哀毀廬墓庭產瑞芝

陶世徵恭介琰第三子選貢生好施予闖執世徵索餉里中被德者為醵千餘金以脫其難生平勤學會講著作甚富

國朝

王家琮絳州諸生居鄉號公正舊例歲報富民凡上官  
供應悉資之琮力請於州守弊遂除

董復真聞喜縣人有至性事父嘉德以孝聞父為族人  
承公毆殺號泣訟寃依律抵比闖賊破縣獄囚胥逸  
承公出入自如順治八年復真猝遇承公於田畔徑  
往撲之承公不勝仆於地復真出利斧斷承公手足  
承公死詣縣請罪縣令鄺奕垣旁搜前案覆視之獲  
免



任弘挺河津諸生闖賊之亂殺其父三榮母辛氏而掠  
弘挺去弘挺至禹門口奮身投河適附巨水以免賊  
黨駭嘆嘗築袁堤導瓜峪水自甲至癸凡十道溉田  
數千畝為邑永利子允釐亦以行義著

段世慶字光緝絳州諸生孝友好義賑粥施藥祀鄉賢  
又段世雲建汾水橋歲給水手工資子孫克繼之

吳偉字巨卿絳州諸生建義學置學田又置田備完族  
人逋賦以義稱子作賓貢生

郝啟絳州人家庭和敬五世同居

楊檟絳州人建義學並置產課租入為館餼王大令震

亨有碑記

王鍾靈閬喜人順治戊戌進士選翰林院庶吉士授檢討主湖廣癸卯鄉試請終養服除補原官累遷左右春坊中允再遷翰林院侍讀與修平逆方畧後獲告歸鍾靈性篤孝十一歲居母喪哀毀如成人繼母丁嚴厲鍾靈事之甚謹丁亦愛之盜嘗夜入室逼父母

寢鍾靈亟起持長矛往格仆其一人羣盜攢刺中十餘槍幾斃得請家居捫舌循牆不敢少軼越而郡邑利病輒力言丁亥採買草豆議令平陽輸大同鍾靈控免其役里人感之

張錦鳳字伯章河津人個儻有曠志事母方以孝聞母冬月病思魚既有饋魚者胥謂孝感里有神峪泉時成深壑迺破千金產築石洞以捍水又築石堤五百餘尺瀦泉水溉田數十頃嘗行炭窰見明李枯骨

巨塚晉人推為義士焉

閻守瑞字小泉絳州人父大江樂善好施守瑞稟質剛  
方言笑取與不苟治家嚴肅童稚飲食坐立悉有規  
矩婦女不冠不裙不得出入戶庭謁廟焚修事禁弗  
行少以孝行稱撫愛諸弟甚摯一錢尺布不入私室  
外姑教以私蓄未終辭而出終身不至其門督學嵇  
曾筠旌曰友行克貞李子潛有傳

儀兆羲字天一絳州人性孝友與弟兆祥析居分已產  
以給之教養二姪胥克成立州人李某負債過於道  
涕泣言數日未舉火憐其貧更付金若干又嘗焚逋  
券七百金年八十七

賜絹米頂帶如例無病卒

閻雋字君美絳州人少讀書尋以事廢然有暇輒誦  
不輟事父母能孝家人謀析居涕泣者凡數日督子  
讀書日益嚴嘗建宋五子祠立嚶鳴社垂歿猶區畫

社倉且以屬其子云

翟垣聞喜人孝友嗜學建義學於西門外延師授餐以  
訓後進辛未歲荒租入千斛罄以賑粥由舉人令太  
平禁止溺女習俗稍變

楊棻聞喜人以父永寧廕官興化同知遷馬湖守解組  
歸辛未歲祲出米賑粥復給戚里麥穀數百石弛窮  
民田租五千石又捐千金築城垣居民德之

牛化麒聞喜諸生甫十歲母卒事繼母孝昏定晨省終

身如一日母疾親嘗湯藥及卒哀毀骨立人皆以為難云

寧獻誠字心一河津歲貢任夏津訓導父令高密卒於官扶櫬歸號泣不輟行人皆為涕零母歿負土成墳廬墓三年

史絢稷山人孝友和翁五世同居

吳伯宗稷山人幼喪父母與弟伯桃伯樂依祖以活比祖歿遇荒伯樂為人掠賣不知其處伯宗歷秦蜀楚

豫間徧求之不得聞在越踪跡年餘復不得又聞在燕復跋涉入京師過人輒涕泣訪問聞高翰林者知弟所在因宛轉以情告高哀之處伯宗家中而馳書西江召伯樂來會伯宗自以見有期意喜甚頃之伯桃以書至謂以尋弟故亦被人掠賣關外閭莊頭家矣伯宗聞之大哭立起如關外將與之直高百計沮之不為止至則見閭索其弟閭大怒斥之去匿伯桃不出遂訴之都閭箠之幾死臥月餘訴如前箠又幾



死伯宗卒不懼閱三年號訴如初至時聞知不可奪  
因縱伯桃去伯宗因與偕入京師而伯樂亦自西江  
來兄弟獲全既相喜旋相泣也一時搢紳艷稱之

杜士則字天一稷山人少有至性事父母以孝聞嘗冬  
月溫被如古人事雖細微必請而後行無敢專者治  
生稍有餘即以奉二人不自私也比奉諱遇有事猶  
跪告主前如生時年幾七十鬚髮皓皓言及父母輒  
孺子泣不止至今邑人稱孝者歸焉

張養心絳縣諸生幼孤奉母馬以孝聞母被賊執棄水中心亦被縛號呼乞命賊感而釋之

柴之棕絳縣諸生好義樂施修平通翼山路及沃邑交裏橋梁魯峪孔道費金粟以數百計子帝蔭亦有父風又有任珩亦以周急賑荒著義聲

王積業絳縣人豪俠好施拾還遺金又王淵郭恩賜祁國英亦以還金稱義

董攔門垣曲縣農家子不識詩書又家徒壁立而至性

過人總角為人傭工日得數錢輒以奉父母年十四  
父病無錢營醫藥徧稽首祠廟以禱父痛楚甚攔門  
淚淫淫下走庭中伏地曰請斷指以代父痛語訖舉  
斧斷三指血流滿前暈幾絕觀者胥感歎父病尋愈  
攔門亦無恙縣令給扁曰斷指全孝

王錫絳縣人家甚貧孝友特至父聘士授陝西同心驛  
驛丞錫徒步從之未半載聘士歿錫悉典衣裝以殮  
復號泣歸里盡產以迎櫬時沍寒同心守備蕭請竢

春且代乞賻卹錫力辭即日就道晝則以繩繫軀躬自挽夜則露宿柩側而號抵家墜指裂頸無復人形見者胥酸鼻母喬氏臥病二載奉事尤力比歿祔父墓慟幾絕從弟瑛璠幼孤不能自活錫字之俾胥有室邑令盧將表之以勵俗固辭雍正八年旌表

陳佐周絳縣人十五歲父所性卒毀甚非杖不能起所性故選貢五經諸史胥有論著佐周見父手澤輒涕泣不止事母李氏不命之退不敢退母或加譴責必

跪受湯藥必親嘗即溺器亦必親滌嘗徒步百里訪  
醫遇盜將殺之虎忽出叢薄間盜駭遁虎亦逡巡去  
母歿寢柩次三年不入室佐周嘗建家廟刊族譜人  
胥謂能守家學雍正八年旌表

吉州

元

馮愈父敬夫病篤籲天割股調藥父遂愈事聞至正間  
旌表其門

明

王爵鄉寧人母喪哀奠盡禮侍父榻者三年朝夕不怠  
由貢生官至蘇州守

徐椿吉州人以廬墓稱孝

鄭崇雅鄉寧貢生任徐溝教諭聞母病棄官歸子四人  
皆有名人謂孝感

盧曠鄉寧思貢歲饑施粥半載全活甚衆又楊鳳翀官  
千總廢產救荒人並德之

冀三聘節婦盧子與妻潘氏事母以孝聞

王有祿鄉寧人正統四年捐賑旌門又鄭崇仁亦輸賑  
王凜鄉寧人家甚貧父病思得肉食與婦定謀剪髮易  
之道經龍王廟致禱得夢於十里外杏樹下取泉飲  
父疾尋愈

國朝

韓倬鄉寧進士官兗州守周急好施曾濟里甲金數百  
兩邑人德之

隰州

宋

趙友七世同居真宗時旌表蠲其賦役

元

賀賁父種德徙居京兆賁有謀畧善攻戰畧關中兵後集屍滿野賁為大塚收瘞之得白金七千餘兩乃持五千兩獻世祖以助軍後以賁總管京兆諸軍鄂囉卒追封雍國公謚貞獻子仁傑孫惟一相繼為上都



留守

孫秀實大寧人性剛毅喜周人急里人王仲和嘗託秀實貸富人鈔二千錠貧不能償棄其親逃去數年其親思之疾秀實日饋薪米存問終不樂秀實哀之悉為代償取券還其親復命奴控馬齋金訪仲和使歸父子歡聚聞者莫不嗟美又李懷玉等貸秀實鈔一千五百度無以償盡還其券

明

蘇四國隰州諸生母病危籲天封股以進病尋愈

曹鼎蒲縣人成化間父官綏德州倉大使卒貧甚置柩車中妻引于前而自後推之行至黃河糧絕相向哭條大風吹樹葉滿前視之乃紅棗也遂得餬口扶柩歸里

郭昇蒲縣人出粟賑荒正統六年旌門又韓藝正德間輸賑六百石

宋承綬隰州人事親稱孝居喪哀毀如素力循古禮先

後無間桑拱陽兩作復古歌以風之

鄧凰隰州人急公好義輸米賑饑倡植桑麻其撫孤姪  
至成立尤有聲

曹懋通蒲縣人父病躬侍湯藥不解帶者數十日焚香  
籲天請以身代比卒廬墓三年善事繼母撫異母弟  
尤為周至

劉餘芳隰州諸生父湛然歿於六安州徒步長號負骨  
歸葬

楊潤隰州人事繼母孝修學賑饑鄉人稱義士

史登義王復榮宋良儒楊春濤俱隰州人以輸賑稱義  
張機大寧人邑有荒塚石題明孝子貢士張機之墓旁  
註廬墓以思親三年不改殺身以全母一死猶生乃  
萬曆十七年知縣程某語也

曹鴻達字肖亭大寧人父汝相患癰疾侍飲食起居十  
餘年不懈比病危如醫言嘗糞甘苦以卜存亡母安  
暮年昏憤旦夕扶哺如父時母卒已九十七歲矣隆

冬號泣鬚眉皆冰廬墓三年櫛沐俱廢時稱東街曹  
孝子

馬尹昌大寧貢生官香河丞有治聲祀名宦初昌病劇  
弟尹康祝天求代卒昌感其義田產悉以畀姪世安  
劉鳳鳴大寧歲貢曲事繼母卒致底豫族居犯而不校  
人尤服其雅量

曹定國字世用大寧廩生事父克孝跬步不離學使按  
郡嘉其誠篤給餼終養

張文炳字斯光大寧人父萬鵬酒後殺人請抵父罪其人復甦時以為孝感

曹自得大寧歲貢性廉介家貧乏米出門求貸路拾遺金還之

馮玉貢生幼孤好周卹邑有干鰥零丁無歸撫養婚配至成立厚賜遣之鰥由監生除淄川承事玉如父終身不替

李善永和貢生流寇至大罵力戰死子世隆世奇蒙難

復甦追賊至臨汾擒之詔旌義士

馬如璧永和人親喪前後廬墓六年

藥科永和人崇禎五年闖賊圍城手持火具擊殺無算  
賊懼而遁隨出已貲設兵三百至今賴之

張斗宸字薇垣歲貢生馮三旌諸生胥大寧人崇禎壬  
申闖寇陷城俱死之

張士粹字懿字大寧貢生崇禎七年出粟賑饑又以廬  
墓稱孝

曹良棟蒲縣人素行狷介崇禎七年大饑棟久不舉火親知聞而餽之棟曰吾既不能自食而反因食累人於義何居堅却高臥七日而死

劉光蒲貢生事親竭力父疾籲天求代疾尋愈執喪哀毀絕葷酒者六載桑拱陽作仁孝詩以贈之

馬行敏永和人官西安照磨崇禎八年土寇充斥單騎追至石樓手斬二級以還十五年知縣冀殉城死經紀其喪並送眷屬歸里



李養榮隰州貢生官王府教授事親至孝前後廬墓六年有白兔之異子愈秀字誠所諸生死闖難祀鄉賢  
呂大成字宗韶隰州諸生闖賊陷城投井死又有王家棟宋希唐暨子永隆同戰死

國朝

宋斗星隰州人饒智畧順治戊子土賊王登憲糾其黨攻州之曇索堡斗星督僮僕暨鄉人捍禦已而賊益衆不能支間道走汾州請兵三百人兼程至賊退據

老兒山為持久計斗星伏兵山側從數人誘賊賊遽  
出戰斗星死鬪賊將還伏兵起乘之賊遂大亂擒斬  
無算曇索堡獲無恙

馮聖真大寧縣人家甚貧客作以養父每饋食至不敢  
先嘗必疾趨執爨供父食乃還傭所或饋食少腆則  
攜歸以食父主者知之復以食饋聖真堅不肯曰焉  
有一人傭而兩人食者比父卒負土為墳哀毀三年  
邑令以扁特旌之然聖真故無廬扁懸闕廟之左廊



山西通志卷一百四十五